

光緒重修安徽通志

重修安徽通志卷一百九十四

人物志

宦績 十七

廬州府

楚范增居鄴人年七十好奇計聞陳勝敗乃往說項梁立楚後
項梁死項羽尊爲亞父從破章邯入函關至戲西時沛公先入
關軍霸上增說羽急擊勿失旦日沛公來增欲於坐上殺之舉
玦示項羽三羽不應沛公去令張良持玉斗一雙奉亞父
置之地拔劍撞而破之曰唉豎子不足與謀吾屬今爲沛公虜
矣漢之三年羽數侵奪漢甬道漢請和羽用增計急圍滎陽漢
患之乃用陳平策閒項王項王果疑增增大怒曰天下事大定
矣君王自爲之願賜骸骨歸行未至彭城疽發背死

史記項羽本紀

漢陳眾廬江人建武中爲揚州牧歐陽歛從事李憲旣破其餘黨遁于臨等猶聚眾數千人屯潯山攻殺安風令歛遣兵不能克帝議討之眾白歛請得喻降臨於是乘單車駕白馬往說而降之潯山人其爲立祠號白馬陳從事云

後漢書
李憲傳

周榮字平孫廬江舒人肅宗時舉明經辟司徒袁安府安舉奏寶景及與寶憲爭立北單于事皆榮所具草寶氏客徐薊深惡之寶榮曰子爲袁安腹心之謀排奏寶氏寶氏悍士刺客滿城中謹備之矣榮曰榮江淮孤生蒙先帝大恩歷宰二城今復得備宰士縱爲寶氏所害誠所甘心故常敕妻子若卒遇飛禍無得殯斂冀以區區腐身覺悟朝廷及寶氏敗榮由此顯名自郎令擢爲尚書令出爲潁川太守坐法當下獄和帝思榮忠節左轉其令復以爲山陽太守所歷郡縣皆見稱紀以老病乞身卒

於家詔賜錢二十萬除子興爲郎中

後漢書本傳

周景字仲饗興之子也辟梁冀府遷豫州刺史河內太守好賢愛士其拔才薦善常恐不及徵入爲將作大匠以梁冀故吏免官朝廷以景素著忠正復引拜尙書令代劉寵爲司空是時宦官任人及子弟充塞列位景初視事與太尉楊秉舉奏諸姦猾自將軍牧守以下免者五十餘人遂連及中常侍侯覽貝瑗皆坐黜朝廷莫不稱之後爲羽尉建甯元年薨以豫議定策立靈帝追封安賜鄉侯長子崇嗣至甘陵相中子忠少歷列位累遷大司農後爲太尉錄尙書事以災異免復爲衛尉從獻帝東歸洛陽忠子暉爲洛陽令秉官來京師後忠爲董卓劫殺

後漢書周榮傳

吳周瑜字公瑾廬江舒人漢太尉景之從孫也父異洛陽令瑜長壯有姿貌孫堅起義討董卓徙家於舒堅子策與瑜同年友

善瑜推道南大宅以舍策升堂拜母有無相通瑜從父尚爲丹陽太守瑜往省之會策將東渡到歷陽瑜將兵迎之策大喜曰吾得卿諧也遂從策攻戰屢有功策使瑜還鎮丹陽袁術遣其弟代尚尚與瑜俱還壽春術欲以瑜爲將瑜觀術終無所成求爲居巢長遂自居巢遷吳策親迎瑜授建威中郎將時年二十四吳中皆呼爲周郎策薨權統事瑜與張昭共掌眾事曹操入荊州權眾皆懼瑜獨說權以兵擊之遂統程普等合劉備其拒操於赤壁以計燒其船及營落大敗操拜偏將軍領南郡太守詣京見權欲謀取蜀還江陵爲行裝而道於巴江病卒年三十六權素服舉哀長男循尚公主拜騎都尉早卒循弟允拜興業都尉封都鄉侯瑜兄子峻亦以瑜元功爲偏將軍

三國志本傳

齊何昌寓字儼望廬江人永明元年以太子中庶子出爲臨川

內史不雜交遊通和汎愛歷郡皆清白士君子多稱之

齊書本傳

西通志

新增

隋樊子蓋字華宗廬江人祖道則梁越州刺史父儒侯景之亂奔齊官仁州刺史子蓋在齊爲東汝北陳二郡太守封富陽縣侯周武帝平齊授儀同三司郢州刺史隋高祖受禪除樅陽太守平陳之役以功加上開府改封上蔡縣伯歷至循州總管煬帝卽位轉涼州刺史武威太守以善政聞朝於江都宮敕廬江郡設三千人會賜米麥六千石使謁墳墓宴故老當時榮之還除民部尙書大業九年車駕幸遼東命子蓋爲東郡畱守楊元感之亂盡銳攻城子蓋徐設備禦至輒摧破帝比之蕭何寇恂進位光祿大夫封建安侯卒諡曰景武威民吏莫不嗟痛立碑

頌德

隋書本傳

唐任瓌字瑋合肥人父七寶爲陳定遠太守早卒伯父忠愛瓌甚篤每曰吾子庸保耳所以寄門戶者瓌也年十九試守靈溪令遷衡州司馬都督王勇委任之陳亡勸勇據嶺外立陳後勇不從降隋瓌棄官去高祖討捕於汾晉謁轅門署河東縣戶曹義師起至龍門請見高祖曰吾其濟乎瓌曰今主政殘酷公仗順而起何不濟瓌在馮翊悉其人情願備一介入關宣布威靈以收左輔乃授銀青光祿大夫爲招慰大使旣而賊孫華白元度果降瓌行說下韓城進擊飲馬泉破之拜左光祿大夫畱戍永豐倉高祖卽位授穀城刺史王世充攻新安瓌拒破之封管國公爲河南安撫大使徐圓朗叛陷楚邱瓌遣崔樞張公謹守虞城圓朗攻之不能下賊平遷徐州總管輔公祏反詔以兵自揚子津濟江討之公祏平拜邗州都督貞觀四年卒

唐書本傳

羅珣廬州人

唐書云越州會稽人萬姓統
緒云廬州人爲本州刺史

寶應初詣闕上書授

太常寺太祝曹王皋辟署幕府累遷副使皋卒軍亂劫府庫珣

取首惡十餘人斬以徇環棘庭中俾投所劫庫物一日皆滿乃

貰餘黨擢廬州刺史禁淫祠修學宮政教簡易有芝草白雀之

瑞再遷京兆尹請減平糴半以常賦充之人賴其利徙太子賓

客封襄陽縣男卒諡曰夷

唐書本傳

楊行密字化源合肥人年二十亡入盜中刺史鄭綮捕得異其

貌而縱之後以高駢薦授廬州刺史畢師鐸陷揚州高駢死行

密舉軍縞素遂入揚州不能守引軍歸廬襲破宣州昭宗詔爲

宣歙池觀察使孫儒來攻擊斬之詔拜淮南節度封宏農郡王

朱全忠使葛從周麗師古來寇行密襲斬師古於清口帝在鳳

翔授行密東面諸道行營都統檢校太尉中書令封吳王全忠

脅帝東遷行密恥憤被病全忠知帝倚行密爲重乃弑帝以絕人望行密發喪不視事因是病篤卒年五十四遺令穀葛爲衣桐瓦爲棺諸將諡曰武忠

唐書本傳

吳駱知祥合肥人雅能治金穀初事田頴爲宣州長史太祖旣殺頴以知祥爲淮南支計官勦精爲理事無畱滯徐溫秉國知祥司財賦一時稱之已而初置選舉命知祥董其事任用得人

武義改元遷中書侍郎

十國春秋本傳

王潛廬州人初居太祖幕府及事高祖官左司郎中典選事喪亂之後官失其守潛隨才而使人人自以爲得徐知誥爲相掄選有序潛之力也

十國春秋本傳

南唐王崇文合肥人綰之子爲歙吉二州刺史吉州民多爭訟崇文無所侵撓吏民便之遷虔州刺史初平建州崇文鎮之民

忘其亂三十年閒出領藩鎮入掌楚兵官至使相常袞衣博帶
與士大夫譚宴風度夷曠後主卽位崇文手書時宜政體備加
箴誨加中書未拜而卒

南唐書
本傳

吳越郭師從合肥人初隸田頽爲都虞候頽敗歸吳越署爲鎮
東都虞候從文穆王璠破廣德征無錫皆有功累遷浙西營田
副使拜同參相府事卒年八十四

十國春秋本傳
浙江通志

宋馬亮字叔明合肥人舉進士爲大理評事通判常州吏民有
亡失官錢連逮者數百人亮縱去緩與之期不踰月悉輸所負
擢知濮州命糾察福建路刑獄全活者數十人知饒州州豪白
氏殺人以赦免愈驚橫爲患發其奸而誅之州有鑄錢監匠多
而銅錫不給請分工之半置監於池州歲增緡錢十萬遷侍御
史眞宗卽位上書言事帝善之王均反以爲西川轉運副使賊

平主將誅殺不已亮全活千餘人召問蜀事會械送賊誑誤者八十九人執政欲盡誅之亮以爲此百之一二耳不如赦之以安反側帝悟盡宥之復遣還部時諸鹽井泉涸而官督所負繫者數百人盡釋之而奏廢其井還知潭州有亡命卒剽掠爲患鄉人其謀殺之坐擅殺當死者四人亮貸之曰去害而坐罪非法意也徙昇州移文守將發糴艘粟以賑飢民累遷工部侍郎知杭州加集賢院學士江濤大溢築隄不就亮禱伍員祠下潮卻數里而隄築成入爲御史中丞後以太子少保致仕卒贈尚

書右僕射諡忠肅

宋史本傳

馬仲甫字子山亮之子舉進士知登封縣輶輳道險厄僱民鑿爲坦途人爲刻石頌美入爲度支判官內侍楊永德言漕舟淮汴閒惟水遞鋪爲便詔仲甫往視還言其害十餘條議遂格由

戶部出爲發運使建議鑿洪澤湖六十里以避長淮之險漕者便之拜天章閣待制知瀛州築甘谷堡以通北抵南谷之路先是羌人入城貿易皆僦邸仲甫設館處之陽示禮厚實閑之也官至知通進銀臺司

宋史本傳

鍾離瑾字公瑜合肥人舉進士通判益州建言州郡旣上雨後雖凶旱多隱之以成前奏請令監司劾其不實者提點兩浙刑獄衙門餼請發米二萬斛以賑歷江淮制置發運使置閘召伯埭旁人以爲利累遷龍圖閣待制知開封府卒

宋史本傳

茹孝標舒城人天聖中進士少負氣節好學不倦吏治有聲仕至都官員外郎出知江州

一統志

雙漸無爲人慶厯中進士博學能文爲職方郎知本軍後知漢陽爲政和易所至見思有古循吏風

一統志

張肅廬江人仕廣東轉運判官以直諒稱後爲江東提點刑獄

自司馬光而下七十有四人分韻作詩以贈其行

廬州府志

楊察字隱甫合肥人景祐元年進士歷江南東路轉運使屬吏以其年少易之及行部數摘奸隱眾始畏伏召爲右正言權判禮部貢院時上封者請罷糊名考士及變文格察謂禁防一潰則奔競復起且文無今昔惟以體要爲宗議遂寢擢右諫議大夫權御史中丞論事無所避御史何郊以論事不實中書問狀察言故事許風聞今以疑似被詰問非所以廣言路也卒贈禮

部尙書諡宣懿

宋史本傳

賈易字明叔無爲人中進士甲科爲常州司法參軍自以儒者不嫻法令議獄惟求合於人情曰人情所在法亦在焉訖去郡中稱平歷官侍御史上書言天下大勢可畏者五一曰上下相

蒙二曰政事苟且三曰經費不充四曰人材廢闕五曰刑賞失

中言頗切直歷吏部侍郎

宋史本傳

張徵字新仲舒城人建炎三年爲御史中丞劾黃潛善汪伯彥

大罪二十條罷知江州尋又謫祕書少監分司西京

一統志江南通志

束元嘉合肥人官通城簿毀淫祠正風俗攝縣令以善政聞後知秦州歲饑賑濟有法全活甚眾累官樞密承旨以老歸年九

十餘

江南通志

王蘭字謙仲廬江人乾道五年進士官武學諭孝宗幸學蘭迎

駕立道周上目而異之問知姓名由是簡記遷樞密院編修官

輪對奏五事上喜見顏色除宗正丞出守舒州陞辭奏疏數條

皆極言時事之未得其正者遂除監察御史一日上袖出幅紙

賜之曰陸贄奏議深切今日恐有如德宗之弊者可條陳來上

蘭卽疏陳時政闕失上嘉納之除禮部侍郎兼吏部光宗卽位遷知樞密院事兼參政拜樞密使除目或自中出未愜人心者輒留之納諸御座或議建皇后家廟力爭以爲不可因應詔上疏條列入事不報罷去後帥江陵湖南終以嫉惡太甚不合去

宋史本傳

王栻字叔永無爲人嘉定三年以宣教郎知涇縣初縣歲有水患栻遷建於舊治之東二里曰畱村民奠厥居創修涇縣志十三卷又著有燕翼貽謀錄五卷言一代之典制頗詳

書錄解題

王杆字元佐無爲人紹興間判汀州府事時郡將陳孝嚴引寇朱積寶兄弟爲腹心仇視禁卒有黃寶者激眾倡亂杆諭之不從欲殺孝嚴杆叱之退嚴度失眾心因以郡篆授杆眾始安後積寶叛屢犯境杆力禦卻之民比屋祀杆曰王生佛

福建通志

元況達廬江人泰定末爲光澤令下車日邑中富豪素爲長吏信從者悉不聽入謁獨延見諸生與講學建雲巖書院有兄弟爭田者授以伐木之詩親爲諷咏解說皆感泣去後爲高安令平反冤獄邑人爲立去思碑

萬姓統譜
福建通志

晁顯字顯卿巢縣人泰定丙寅爲平江路總管以廉自律人不

敢干以私申教化課農桑痛革奸弊爲當時所稱仕終平江府

萬姓統譜

秦天祐舒城人初任本縣丞勸農恤孤不事鞭扑人皆敬畏遷

知六安州值地多寇天祐與許榮悉力保障眾賴以安

廬州府志

明夏君祥字天瑞無爲人元季兵亂以材武信義鄉里推爲城

主明兵至率眾歸附仍奉命協守本州修城繕墉調治兵食升

知州

廬州府志

董興廬州人明初鎮守黟縣羅寇劫掠興率民兵固守寇平歸

朝夥人繪像祀之

南徽志 舊志徵州府名宦 新移

薛祥字彥祥無爲人從俞通海來歸爲水寨管軍鎮撫轉漕河南夜半抵蔡河賊驟至祥不爲動好語諭散之帝聞大喜授京畿都轉運使分司淮安濬河築隄自揚達濟徭役均平民無怨言元都下官民南遷道經淮安多方存恤山陽海州民亂誣誤甚眾祥會鞠無驗者宥之治淮八年考滿還京皆焚香祝其再來肖像祀之授工部尙書帝坐鳳陽宮殿見殿脊有持兵鬪者李善長奏工匠用厭鎮法帝將盡殺之祥爲分別活者千數天下行省改爲承宣布政司以北平重地特授祥爲胡惟庸所惡詢知嘉興府惟庸誅復召爲工部尙書帝曰讒臣害汝何不言對曰臣不知也後坐事杖死天下哀之子四人謫瓊州遂爲瓊

山人孫達正統七年進士天順中爲工部侍郎奉詔塞開封決

河成化初督兩廣軍餉位至南兵部尙書

明史本傳

蔡美字世宣廬州人洪武初知績溪縣縣南有田千餘畝旱則

無穫美召耆老相視水源於上三里乳溪口鑿石築碣引水灌

田遂得常稔

南畿志舊志徽
州府名宦新移

申泰無爲人洪武中以薦知延平府會諸守有以賊敗者令軍
校徧搜各省知府至延平止得米三升鈔二貫考天下清廉第

二一統

志

張遇林廬州人洪武元年知泰州創官署興學勸農修復橋梁

坊表士民懷之

泰州志

文景宗合肥人洪武初授婺源州同知升知徐州時天下初定

招徠勸課民皆安業擢守濟南徐人立祠祀之子簾以廉幹薦

知潛江縣

南畿志
廬州府志

史希賢字士功無爲人洪武初以薦知瀏陽縣時荆湖新附開

創邑治興建學校邑人立祠祀之升廣平知府

楚紀

程宗道舒城人洪武三年知平定州建州署學校壇廟郵舍撫

綏凋瘵民有起色

一統志山
西名宦

孔立合肥人洪武元年知象山縣歸附之始百廢未興立至庶

政遂舉是年夏蘭秀山寇亂民甚驚駭立設計殲其渠魁餘黨

悉平他若息虎患弭旱災皆其德化所感

浙江
通志

唐宗義廬州人洪武三年任揭陽知縣見吏胥里甲多罹獄具

愀然問曰爾等何至此耶各白其故因諭以釋之歷政三年徭

均訟簡民懷其惠升廣東都司斷事

廣東通志
新增

楊偁字廷舉合肥人太祖取太平以偁知蕪湖縣首詢疾苦興

利除害招徠遺黎撫摩凋瘵建縣治立坊倉以治稱

南畿志

王俊字大用合肥人洪武五年任雲南前衛指揮使二十二年升都指揮同知調廣南衛適儂真佑叛帥眾攻之傾其穴擒真佑以獻斬首數千級獲輜畜無算築城設衛而還永樂初以入賀升都指揮使賜文綺犀帶在任三十餘年戎事無巨細多所

綜理

雲南通志
新增

蔡誠巢縣人洪武初知安陽縣時百姓新附田蕪不治誠買耕牛給貧民由是地闢民富凡縣廨學校皆誠所建

一統志河
南名宦

桑昭無爲人洪武十七年由金吾前衛指揮僉事掌南海衛印歷十年愛軍恤民造修公廨營房倉庫展廣土城街道溝渠清潤昌化海口三所皆所創置申呈不立屯田廢東西軍營以地

入廣治民到於今稱之

廣東通志
新增

孫鎮字希武合肥人洪武中以經明行修除戶部主事時上以課程事罪部官鎮抗言謂不宜連坐忤旨戍滇南以薦復職出爲衛輝知府毀淫祠撤浮屠興學課士教民樹畜驅蝗禱雨事率立應靖難兵起衛輝當其衝鎮堅守不下成祖卽位遣戍山海宣德初赦回除上饒丞不就卒於京邸

遼國諸臣傳

蔚綬字文璽合肥人洪武中授戶部主事歷山西參議永樂間召拜禮部侍郎秉心純實履行端方以禮部尙書致仕卒諡文肅同邑蕭敏洪武乙丑進士官監察御史以風節著又程嘉貞以薦爲中書省都事嘗諤有骨鯁風歷官山西按察司僉事

志

江南通志
廬州府志

陳大本無爲人洪武中任贛州同知撫民以寬臨吏以莊應務以敏尋升本府知府吏民熟其政雖公務煩劇凡所號令不勞

而集遷浙江參政

明統志 江西通志 新增

陳瑄字彥純合肥人父聞以義兵千石歸太祖累官都指揮同知坐事戍遼陽瑄伏闕請代詔併原其父子瑄少從大將軍幕有功建文末遷右軍都督僉事燕兵偪命總舟師防江上燕至浦口瑄遂迎降成祖卽位封平江伯命充總兵官總督海運輸粟四十九萬石餉北京及遼東遂建百萬倉於直沽城天津衛舟還會倭寇沙門島追擊至金州白山島焚其舟殆盡海溢隄圯自海門至鹽城百三十里命瑄以四十萬人築治之爲隄萬八千餘丈嘉定瀕海江流衝會海舟停泊無所瑄請於青浦築山方百丈高三十餘丈立堠表識旣成賜名寶山成祖自爲文記之宋禮旣治會通河議罷海運仍以瑄督漕運造淺船二千餘艘初運二百萬石寔至五百萬石國用以饒時漕舟抵淮安

陸運過壩踰淮達清河勞費甚鉅瑄自淮安城西管家湖鑿渠二十里爲清江浦導湖水入淮築四閘以時宣洩又沿湖十里築隄引舟由是直達於河省費不貲復濬徐州至濟甯河又以呂梁洪險惡於西別鑿一渠置二閘蓄水通漕又築沛縣刁陽湖濟甯南旺湖長隄開泰州白塔河通大江又築高郵湖隄於隄內鑿渠四十里避風濤之險又自淮至臨清相水勢置閘四十有七作常盈倉四十區於淮上及徐州臨清通州皆置倉便轉輸慮舟膠淺自淮至通置舍五百六十八舍置卒導舟避淺緣隄鑿井樹木以便行人仁宗卽位上疏陳七事帝曰瑄言皆當命所司速行尋賜券世襲宣宗卽位命守淮安督漕運如故六年言歲運用十二萬人頻年勞苦乞用二十四萬人分番迭運更民運爲兌運自此始卒於官追封平江侯贈太保諡恭襄

孫豫字立卿正統末福建沙縣賊起以副總兵從平陽侯陳懋討平之進封侯也先入犯出鎮臨清建城堡練兵撫民安靜不擾召還父老詣闕請畱從之山東饑奉詔賑卹尋守備南京卒贈彰國公諡莊敏子銳嗣伯成化初分典三千營及團營尋佩平蠻將軍印總制兩廣移鎮淮揚總督漕運建淮口石閘及濟甯分水南北二閘築隄疏泉修舉廢墜日本貢使買民男女數人以歸道淮安銳畱不遣贖還其家歲饑疫煮糜施藥多所存濟河決張秋奉敕塞泊累加太傅兼太子太傅卒

明史本傳

方正合肥人永樂中徵修大典授工部主事時建北都督工規畫有條由屯田郎擢江西參政平峒賊遷福建布政同邑龍源亦預修大典授工科給事中親喪家居見民牧不良卽聞於朝

其人賂當道誣之卽罷歸

一統志

徐鑑字明夫無爲人由歲貢入太學成祖夜微行聞其書聲次日召見嘉其有風憲體命按湖湘及涖任糾劾百司藩府震懾

升金華知府

廬州府志

張敬字伯起合肥人永樂中以貢授御史扈從北征軍令嚴肅監延平府銀屏山務歲輸外不染一毫擢陝西按察使僉事政尙平恕被誣左遷令廣平勸農興學惠愛覃敷復官僉事致仕

廬州府志

周璞巢縣人同知全州永樂中預修大典授吏科給事中糾劾不避權貴朝有諫垣得人之慶

廬州府志

丁毅字士宏無爲人永樂乙未進士選庶吉士時近倖有紀綱者勢傾中外毅獨以年少詞臣持正論與之抗綱服其直不能害年三十卒眾論惜之

一統志

丁鏞字元聲毅從子正統初以貢官戶部主事督天津等倉絕

賂遺一繩以法升廣西參議以寬大得民致仕

舊姓通諸廬州府志

王憲合肥人永樂辛丑進士官御史彈劾無所忌擢山東副使

鎮遼東參贊機務邊境肅然進貴州廉使同邑吳鑑宣德丁未

進士官御史剛正不阿嘗乘花馬京師比之驄馬御史後官南

陽知府

廬州府志

鄭泰字景暘舒城人永樂辛丑進士官給事中諫言動眾進都

給事超補刑部侍郎璽書褒美天順初遷吏部左侍郎卒賜祭

葬

一統志

余斌合肥人宣德中爲定海衛指揮使建議學延師儒令軍民子弟咸肄業焉暇則躬詣考閱而激勵之自撰公勤廉謹四銘書於廳事以自勵城南海山有大浹渡常覆舟溺人爲文祭之

後遂無患調處州升浙江都指揮僉事

浙江通志

湯鼎字玉鉉無爲人宣德庚戌進士官吏科給諫交趾侵邊廷

臣舉鼎爲使鼎往歷陳利害眾懼服不敢動卒歸侵地正統閒

官通政司卒官

廣州府志

朱昂字廷舉無爲人以貢任應天府判入爲工部郎用周忱薦

領江南糧儲歷福建參政巡海有聲績掌臬司事時三日出濫

繫二百餘人致仕歸地方利害必陰白有司人或造謝則杜門

不見

一統志
江南通志

操欽合肥人正統中爲辰州府推官廉介不畏強禦豪右畏服

民多德之

湖南通志

李春字景陽無爲人正統丙辰進士官兵科給事中轉福建參

議汀盜起直抵其巢諭降進江西左參政撫諸洞反側者悉就

馴伏歷兩藩俱著聲績一統志

胡珉字文佩舒城人正統壬戌進士授戶部主事簡直清約當路惡其慤遷衛輝府判引疾歸復以薦爲漳州府同知同邑蔡瑛字叔輝以貢任嘉興府推官明允無冤獄擢御史巡按江西

廬州府志

方杲字景輝合肥人正統乙丑進士授兵部主事升員外郎上時務十二事剴切有資治體少保于謙稱爲有用之才廬州府志

蘇會廬江人本姓汪景泰間官雙流典史善弓馬習番書番人不靖撫按命往宣諭眾皆悅服擢仁壽知縣有惠政民爲立祠

升茂州知州

廬州府志

葉鸞字應和舒城人景泰辛未進士官貴州參議黔中雜苗難治鸞廉靜忠誠按部所至一斷以法有宣慰判人腸藩臬諸司

莫能糾轡馳諭卽謝罪又宣慰有奪嫡者僉允其請轡獨不署

名親老授副使終養

一統志

鄭時字宗良舒城人景泰辛未進士官御史以釐直降內鄉知縣升延平守擢撫陝西歲饑賑恤百方屢奏請得蠲逋租停雜派又以時言詔湖廣米十萬石銀二十萬兩往賑民大蘇息平礦盜奏設甯羌等處巡司職專守禦萑苻屏息成化末有挾左道得幸者上疏論之陳利國保民五事忤旨謫貴州參議宏治初召爲左副都御史歷南刑部尙書致仕卒贈太子少保賜葬

祭

舒城縣志

沈謏合肥人景泰甲戌進士歷戶部郎知東昌府政尙嚴明折獄平允常祿外不入一錢吏部考核天下廉能官注第一

一統志

黃鉞舒城人景泰閒以舉人知遼州聰明果斷蒞政克勤修學

校舉百廢士民思慕不忘祀名宦

山西通志

鮑德字秉仁舒城舉人知衡山縣調華容興學勸農懲奸理枉

治稱湖湘第一仕至饒州同知

一統志

王恆字克昌廬江人父敬官大理評事嘗力白王恕之冤眾論多之恆以童子從父南雍習膚孟舉大書英宗召至御前作天下太平四字上喜甚送翰林院讀書時年十二擢中書舍人移工部主事權蕪湖關卻羨餘數千緡領度支司漕淮上興利革弊多所建明

一統志
江南通志

潘稹字景徵廬州人天順庚辰進士由監察御史擢福建按察副使明慎果斷獄無冤滯福甯產銀礦先是輸課者加耗息至千因發其奸而以補他課之逋擢四川按察使

福建通志
新增

朱賢字從善廬州人天順庚辰進士擢監察御史成化閒按閩

操履端方不避權勢

福建通志
新增

秦民悅字邦約舒城人父鳳衛輝府同知民悅成天順丁丑進士授行人升工部員外郎裁抑中官私剋之弊出爲廣平知府雪死囚十九人清牧馬地三千餘頃招集流亡六千戶擢江西參政歷南吏部尙書以星變偕九卿陳時政二十三事多議行卒諡莊簡

一統志

郭鉉合肥人爲彭城衛指揮使以從征荔浦功進都指揮僉事遷同知升鎮守廣西副總兵破府江獍賊擢總漕運沈毅有將略累進都督同知凡軍民利病必陳於朝嘗濬通州河置壩令淺船搬運歲省白金數萬筦漕十三年召佐後府卒

明史王信傳

吳凱合肥人成化壬辰進士歷兵科給事中封駁敷奏動存大體承旨覈邊儲罷武弁不職者四百餘員仕至廣東少參

一統志

姚壽字維祺舒城人成化甲辰進士授行人擢御史正德中累疏指斥中貴爲逆瑾所惡謫貴州驛丞遂自裁死聞者惜之

廬州志

張涓合肥人成化丁未進士知瀏陽縣民頌其德及去爲立遺詠樓擢御史出勘牧馬草場請罷近畿仁壽宮皇莊以益牧地議雖不從他皇莊所侵據者緣是悉還民按貴州擒叛酋普安阿保父子撫其黨五十九寨籍爲編氓轉吉安知府俗好訟蔓引動數百人泣以嚴明訟遂衰止釐正版籍役均弊絕故有堂食錢涓悉給還歲省民數千兩民爲立祠累遷至副都御史

湖南通志

仰昇字晉卿無爲人成化乙未進士累官兵科給事中疏議宮掖事忤旨出爲按察司僉事後官至河南左布政

廬州府志

鄭昌舒城人宏治初知安吉州安吉歲運白糧民以爲苦昌爲

奏請除之

浙江通志

周琥合肥舉人爲撫州推官升通判宸濠叛撫守病委琥代攝濠遣收郡印琥拒之郡獲保全王守仁令督運餉贊兵事以勞

卒

廬州府志

方欽字寅之巢縣舉人知福山縣流賊陷城欽以好官不要錢獨免剝瑾用事當道斂金銀獻媚欽無所有遂謫官歸子槩以舉人知平陰縣耿直忤時亦有清操

一統志

重修安徽通志卷一百九十五

人物志

宦績 十八

廬州府

吳璟字定君無爲舉人授內閣中書知商城縣恪謹廉明興利

除弊士民賴之

廬州府志

蔚春字景元合肥人宏治癸丑進士歷兵科給事中陳時政八
事邊務七事成見施行累升福建參議廣西參政以鯁介爲忌

者中傷乞歸

一統志

楊欽字敬之合肥人宏治壬戌進士授戶部主事監度支平斛
面清部卒倉場肅清疏論錢弊通商貨戍玩法攬頭數十人升
郎中裁抑私符條陳邊事擢光祿少卿守正杜私與時齟齬後

晉鴻臚卿卒

廬州府志

曹琥字瑞卿巢縣人宏治乙丑進士授南工部主事轉戶部御

史周廣疏劾錢甯下獄琥抗疏救之被杖責貶尋甸通判改黃

州遷廣信同知時甯王暨鎮守中貴託貢獻頻有徵斂琥攝府

事堅持不予擢鞏昌知府未任卒贈光祿卿

明史周廣傳

向明巢縣人宏治閒以舉人任趙城知縣禮士愛民遇婚喪不

能自給者捐俸助之卒於官祀名宦

山西通志

方鐸字廷論合肥人正德甲戌進士知武康縣潔己愛民政平

訟簡吏民悅服

浙江通志

沈俊字人傑合肥人正德辛未進士知萊陽縣賦役繁重俊極

力湔刷擢御史出按山西湖廣老成持重官終山東參議

廬州府志

吳廷翰字崧伯無爲人正德辛巳進士歷兵戶二部主事轉吏

部出歷廣東浙江僉事升山西參議所至不激不隨撫循建白并井可法曾被命採端溪硯正供外不持一枚其廉謹類如此

江南通志

陳文偉舒城人正德時知安邱縣時流賊突入縣署掠庫金文偉俟其去挾彈乘一騎馳赴之識其爲首者彈發中左目又發中右目賊大駭伏地請死偉曰第爲我送金還庫當貸汝賊惟命文偉以一騎尾其後抵縣羣賊乞死笑曰不足污吾刃悉杖而還之

山東通志

王欽字宗堯無爲舉人知齊河縣不以家累自隨政尙簡靜齊人立碑頌之祀名宦

廬州府志

謝憲字君弼無爲人爲平湖縣丞廉平不苛嘉靖閒倭寇竊發憲獻策不報因告歸子封嘉靖丙辰進士官吏部主事

廬州府志

岳倫字天敘無爲人嘉靖丙戌進士授行人歷工部郎名重一

時己亥諫南巡被杖削籍

鹽州府志

方介字子和合肥人嘉靖乙未進士知義烏縣調黃巖廉公有

威痛細豪右時有琴堂第一方之謠後爲工部郎中升處州知

府

浙江通志

董子策字霞峯合肥人嘉靖戊戌進士以戶部郎視榷濟墅關
商舶輻輳乃就關傍別開支河令曰凡舴艋可出此橋者聽商

民德之

江南通志

宛嘉祥字白湖廬江舉人剡黃信守臨清遷戶部郎知貴州思

南府刑清政簡時有土寇聚眾爲害嘉祥設法撫戢四境帖服

民立碑頌德肖像祀之

一統志

劉崙字山甫無爲人嘉靖甲辰進士擢御史巡視陝西修舉茶

馬八事回按順天疏陳畿輔災荒疾苦轉太僕少卿會景王之
國廷議恐其騷擾擢崙湖廣巡撫及期營辦有方公私不擾楚
人頌之統志

黎鵬舉合肥人嘉靖中任福建北路參將破倭福甯衝沈其舟
獲潘若海江一峯二酋泉寇悉定福建通志
新增

柳希玘字子敬廬江人嘉靖庚戌進士歷官郎署以繩抑動貴
出守廣平治河隄以塞橫流創書院以育英俊實倉儲以賑荒

早官至湖廣參政廬州府志

曹本字子立巢縣人嘉靖庚戌進士知慈谿縣以禦倭寇功升
戶部主事督理糧儲清各閘車戶船戶諸弊廬州府志

萬振孫字性儒合肥人嘉靖壬戌進士自部郅知襄陽府作人
造士寘學田一千三百餘畝社學一百有八所獨建書院一助

建者六舉覈屬令贓過雖監司為解弗釋也升副楚臬礦使縱橫振孫捕其爪牙立斃之忤旨削籍起廣西參政未就卒

一統志湖

北名宦

江南通志

朱來達字文甫廬江人萬歷丁丑進士知秀水縣善察民隱人莫能欺獄必委曲勸諭尤加意蠲厚治行稱最又除雜差以蘇民禁私販以惠商仕至太常少卿

一統志

盧泮號龍崖無為人萬歷庚辰進士為延平推官多所平反知廣平府捐俸築閘濬渠升四川副使平播有功以觸忤權貴歸

廬州府志

蔡淑達字雲衢合肥人萬歷癸未進士知上虞縣調商南招集流亡興文釐弊權璫以派礦為秦害達請之大吏得免苛擾轉戶部郎督浦口糧又督龍江關稅冰清自矢宿弊一清出知南

甯府值剿黎寇用兵部署有方軍餉無缺晉雲南副使權布政

司事清糧儲均徭役禁有司不得擾而課額用饒以勞卒

廬州府志

寶子偁字燕雲合肥人萬厯壬辰進士授大理評事抗疏請建

儲出守泉州課最督學湖廣大計注廉明第一遷浙江按察使

清貞剛斷斥絕請託奸橫斂跡進右布政一日曉關門左藩遣

人昇巨桶至曰此羨餘也解京餉畢例宜分送子偁勃然曰朝

廷正苦餉不足安得有羨餘哉斥昇去取水滌之遷福建布政

使

一統志
浙江通志

閻球字肅仲巢縣舉人知武強縣歲饑詢疾苦勤賑貸建學修

志士民繪圖以祀

廬州府志

朱萬春字寔同無為人萬厯辛丑進士知上饒縣遇璫暨開採

之擾省長差拖累之患擢御史劾本兵糾總河論首輔請東宮

出閣講學按四川奏留帑金充採辦免加派賑荒災轉江右道

平都湖劇賊歷升左通政

一統志

王性合肥歲貢萬厯間知欽州賦性剛決不避權貴時內監採

珠索用具甚急力沮獲免民賴之又值猖賊犯境性提兵履險

搗其巢穴賊平境內始安功狀紀錄

廣東通志新增

吳光義字行可無爲人萬厯辛丑進士知仁和縣有異政擢工

部主事理山海關流民亡繻者多不得歸百計周全生還者數

萬人備兵神木轉四川副使以平奢賊功歷升河南巡撫參劾

藩宗除民害調兵助民夫築塞河決獎廉鋤強禦寇有方賊不

敢犯內艱歸起倉場總督轉兵部侍郎以老乞休河南祀名宦

弟光宇字達可歷官江北屯田道歲祲民不能耕田多荒蕪捐

俸爲備牛種農器民甚賴之

一統志河南名宦廬州府志

龔承先字元鑑合肥舉人知汾水縣愛民禮士敬老恤孤修學築堰百廢具興禁革一切陋規升祿勸州知州子萃肅萬厯丙辰進士授吉安推官部注清官第一擢御史論邊督張我續貪冒之罪白知州汪心淵守徐之功糾袁崇煥之壞疆場舉方震孺之有才品累升太僕寺少卿

浙江通志
江南舊通志

趙一韓字如勃巢縣人萬厯甲辰進士授九江府推官時中璫收稅恣橫痛繩以法遷南工部視榷蕪關廉聲茂著晉貴州副使魏璫時能以直節自振

一統志

濮中玉字琢如舒城人萬厯丁未進士知長興縣值歲祲家歷戶閱賑賻無遺表節孝興人文省船役皆其政之最先者官至

太僕寺卿

浙江通志

劉汝佳號紫芝無爲人萬厯丁未進士授工部主事督修都城

省水衡金錢數萬轉都水郎建議每船止抽一單空船宜免後

知金華府憫糧里僉解之苦改用幕官下戶盡食其福

廬州府志

徐繼芳合肥人萬厯中知益陽縣值大旱繼以疫癘繼芳停征

已責步行祈禱以勞疾卒官

湖南通志

許如蘭字湘畹合肥人萬厯丙辰進士知光州遷工部郎中出

守紹興三江閘圯捐俸修築如舊制海塘關三縣田禾區畫永

久疏通之法越民賴之擢密雲兵備歷廣西巡撫折悍藩平普

莫二賊進副都御史

一統志

胡志藩字屏玉合肥人天啟乙丑進士授中書舍人先是郡中

馬驛係六邑協濟後獨累肥民爲重困志藩具疏言其不均部

議得允鄉人德之擢御史出按宣大驕將悍卒靡不懾服卒於

官

廬州府志

秦日升字東陽無爲人以貢任休甯訓導魏璫以黃山案籍沒
吳守禮多所株連有吳姓者坐贓十萬郡守石萬程命吳賂日
升三千金俾再坐一人分任其贓拒不受謁石守曰天下事至
此日升雖首藹窮儒不願爲此守感其言懸印梁上夜半披緇
去日升亦乞休歸

廬州府志

張克佳字士奇無爲人崇禎戊辰進士授青州府推官時白蓮

賊煽亂每於雪夜單騎巡警一郡以安引疾歸

廬州府志

賈或字煥章舒城人以貢官韶州推官韶山險峻猺獍出沒或
募兵搗其穴平之嶺南素無雪是夕大雪三尺僉謂平寇所致

廬州府志

張振鸞舒城歲貢授歸安丞邑顯宦沈淮家通糧執其僕笞之

趣納如數署武康縣事有誓神殪虎之異

廬州府志

吳士講字心啟合肥人崇禎辛未進士以員外郎歷知開封府有惠政李自成攻圍歲餘城中食盡至鋸樹屑分食尙從周藩竭力死守河決後得乘桴出敘功升川南道廬州府志

傅時勉無爲人崇禎閒知松陽縣冰檠自持撫小民極眞摯詞訟願息者聽經旬不用鞭撻夏旱停徵適大府檄取舊逋時勉曰此何時而克辦此詳請緩期竟以獲罪降調松人罷市巷哭

浙江通志
新增

任大成字玉仲舒城人崇禎甲戌進士官大理寺評事恤刑兩浙擢御史有治亂關乎用人一疏又參鳳督馬士英擁兵糜餉不報復出按浙時勢雖不可爲猶能整肅一方江南舊志
廬州府志葉士彥字無美巢縣人崇禎丁丑進士授刑部主事調兵部出爲江西僉事左良玉兵不戢士彥致書曉以大義言足下心實

無他緣兵驕不用命累及其主良玉心服撤兵後與章撫不合

謫歸

廬州府志

王興集縣舉人知崇德縣愛民教士修舉廢墜調內江遷知廣

安州修學宮平賦稅均徭役明刑獄一時稱善治

廬州府志

任遵道號時齋舒城人以貢任餘干訓導以明道爲己任訓士

以明倫爲主遷黃巖教諭再遷金山衛教授以老乞休黃巖祀

名宦更立專祠

廬州府志

國朝趙函乙字授若合肥人順治丁亥進士授戶部郎樅崇文門

稅以千金羨納公帑爲江西督學修進賢坪宋忠義密公祠有

記

廬州府志

龔鼎孚字孝結合肥人以舉博署仙居篆民多踞山爲盜有願

歸農者不敢擅還鄉鼎孚爲請於撫按給牌免死資以農具全

活無算

江南舊志

王綱字燕友合肥人順治壬辰進士授刑部郎改兵部督捕逃案山積綱振滯獄釋株連冬月流徒出關者給湯粥衣絮遷巡倉御史終通政參議

一統志

王絲字言如台肥舉人授黃州推官斷獄明愼每定爰書至忘寢食嘗讞副將高誠且之獄高密以罌貯金假稱鹽齎以進絲峻拒之後以他事挂吏議左遷裕州僉判裕荒倣又值衝衢絲出資墾荒以歲收代民煩費

一統志湖北名宦廬州府志

張肯穀字式似巢縣歲貢知神木縣署泰州事時巴三綱之亂賊眾潛布城中猝發被執誘降不屈給守者得脫奔叩幕府陳進剿策躬爲嚮導一鼓而三綱授首遷鳳翔知府調濟南皆著

治績

一統志

夏景耀字穉光廬江人以貢知儀隴縣蜀中經兵燹儀尤殘破招徠勸墾流移漸集升岳州府同知時寇賊蠭起民喜鬪訟景耀臨御有法城市奠安勘災傷理積逋躬親勞瘁吏不能欺卒於官士民莫不流涕

岳州府志

吳開允字志從無爲人順治初知建甯府時賊初平有司利明都憲張養素家財誣爲通賊喉總戎發兵繫男女百餘口制撫檄開允訊之詣總戎家索囚軍士譁開允厲聲曰爰書未定張氏男女可畱軍中乎如不盡發某卽以印檄繳總戎馳報制撫矣總戎悚然付之旣至置府門外廡取民間保媪守之雞鳴會廳縣焚誓城隍廟立白其冤悉縱遣之制撫咸曰治獄如吳守七閩不難治矣

廬州府志

仰鳳鳴字寢明無爲人順治初以歲貢任婺源教諭升太平教

授代理府事禦寇有功歲荒發廩賑濟全活甚眾擢西安府同

知致仕

廬州府志

楊交泰無爲歲貢知番禺縣時郡邑初定兵駐廣州居民駭恐奔竄不安交泰招集流移民漸帖服時尙有負固巖穴者將遂進剿交泰諫阻請往諭之單騎深入告以禍福眾感其誠欣然歸附近城有山險峻恐有伏莽將舉火焚之又力阻之獲免搜山得男婦數百人令其族屬率歸由是番禺安輯以積勞成疾乞休歸士民建祠以祀卒年九十六

廬州府志

許明章字公斐舒城人順治戊戌進士知陵水縣縣賦羨耗幾俸正額明章盡革其弊令民出穀米牛羊雞豚之屬官爲平價鬻之以補從前逋賦勤開墾嚴保甲遷德州同知

江南通志

沈汝蘭字仲晚巢縣歲貢官泰州訓導海寇薄城協力守禦白

諸生之被誣陷者七人

江南通志

王緯字又如合肥舉人爲徽州教授訓厲生徒先實行而後文

藝遷東光令寬惠勤敏民感戴之以老乞休攀轅者塞道

府志

黃應庚字西有舒城人以貢知桂陽縣徭獍雜處素稱難治應

庚示以忠信利害盡皆悅服先是邑躡於魃獍民多流亡招徠

安集戶口漸充擢守遼州尋補嵩明爲民除弊課士最勤卒於

官

府志

黃應宮字生徵合肥人順治中以貢知蕭山縣縣瀕海多坍田

逋賦爲民累力請大吏永免之海多盜計擒其渠盜賊屏息曾

孫達乾隆間舉人爲長洲教諭修學養士蘇人祀之名宦

府志

胡守欽字君若舒城人以貢知徐聞縣縣多土豪守欽下車卽

擒其魁治之一邑驚爲神明

府志

張名世無爲舉人授廣德學正升垣曲知縣縣居萬山之中城大如斗地瘠民貧名世飲冰日矢撫綏備至士民愛戴卒於官

廬州府志

吳間啟字旦門無爲歲貢知文登縣康熙丁巳文營以給餉後期兵譁變起間啟身被六創猶單騎入營諭以禍福一夕而軍心定民得安堵邑紳繪有山左定亂圖並立靖亂碑於蓬萊閣弟敏文字虞升諳韜略從征以軍功知醴泉縣釐弊剔奸下士惜民咸愛戴之弟昊字宇高由廩貢任祕書院中書升楚雄府同知奉調領民夫五千往黔省撥運吳藩家口赴滇會吳逆已叛昊潛以單騎出重圍由九盤奔赴荊州軍視師親王暨閩外諸大臣嘉其完節交章薦之授開封府同知

廬州府志

朱前詒字燕以無爲舉人知長沙縣均賦役課農桑新學校百

廢具舉移知麻哈州苗民雜處號稱難治前詒撫之以誠恩威並濟苗皆悅服州故無學宮詳請建學擇民之俊秀者親課之以時稽其勤惰評其優劣士咸感奮每試入學二名遂有登賢

書者遷順天府治中未赴任卒

一統志 湖南通志 廬州府志

洪濟巢縣人康熙八年任福建泰甯知縣創行滾單法民無差援修邑志葺城垣建迎恩橋創李朱二公祠皆彰彰可紀

福建通志

增新

張國城字宗子舒城人康熙甲辰進士知高明縣值盜掠泐泔村請兵殲其賊首遂遷更團練鄉兵招徠流亡免徭役之累民

者賊黨化爲良民

江南通志

胡永亨字華美舒城人父守恆罵獻賊死永亨募勇士夜入賊營收父骸而葬之康熙庚戌成進士典試江西公慎自矢遷戶

部郎奉

命鞠廣東獄仁恕得情分巡肇高廉羅道飲冰茹檠於積弊多所釐剔

一統志

許孫荃字友蓀合肥人康熙庚戌進士歷戶部郎中督通漕代納旗丁積負督學陝西勤於課士行部所至遇古聖賢名蹟力爲修復表章敬禮名儒李禹輩爲刻其所著書行世著有華嶽

慎墨堂等集

一統志陝西名宦廬州府志

任振世字德長舒城人前明時流寇陷舒父與賊遇以身扞父

賊感而釋之康熙癸丑成進士知曲周縣釐剔稗政案無留牘

禮儒課士民風丕變漳流徙溢無常築隄禦之水患永息

廬州府志

陳略字石友舒城人康熙己未武進士授蘄衛守備清屯裕潛

恤災減派軍民便之設牛確磯救生船建鳳麓書院置田養士

升興化遊擊

江南通志

宋元徵字式虞廬江人康熙戊辰進士知夏津縣廉節明大宦僕殺人主名未得忽塵沙旋馬首詣宦宅試呼揚成果得其人一訊而服河淤漕滯默禱河神水忽騰涌沙分舟過不煩牽挽人咸異之歷刑部郎中有宦告奴叛主察其辭色有異微服訪之乃其子之師宦豔其妻之色而誣之立置宦於法卒後夏津

人祀之名宦

一統志山東名宦廬州府志

湯愛鼎字旺衡巢縣人以廩貢訓導靈璧遷知滿城除羨耗清疆里抑強梁擢知瓊州參劾屬吏貪酷者不少貸

江南通志

龔士正字伯通合肥人康熙時副榜以蔭官工部郎京闈號舊

祇苦蓋士正請易以瓦至今便之出爲僉事分巡湖南北驛鹽

道言事者議減驛費力持不可設救生船立程站民食其福署

按察使釋株累甚多著有冬官條議嵯郵彙稿署臬爰書子志
夔以貢官定遠教諭遷知安仁縣燬淫祠除田賦擠總包賠之
害卒於官

廬州府志

楊厥美字問善廬江貢生知嵩縣縣經寇掠室廬俱盡城垣亦
毀厥美捐俸修築又修邵程三夫子祠墓詳請程子裔孫宗昌
襲五經博士升知莒州以勞卒官

廬州府志

李夏盛字質符廬江人由理藩知事知孝豐縣催科有法斷獄
持平調嘉興鬻產償民積欠

廬州府志

程本道合肥拔貢官戶部主事監督西倉有善政弟本正徵修

一統志後歷攝興平諸篆

廬州府志

朱大復字敦士無爲舉人考授中書改休甯教諭兩署縣篆治
事慈和凡有關於學校悉爲整理尤愛啟迪後進深得士心升

國子監學正卒年八十五

廬州府志

李元正字會符廬江人以廩貢司訓太倉州捐貲修葺學宮構三益堂新雨軒於齋中延接名流訓課諸士遇寒士解囊以贈奉委督賑惠周於民費不足捐私米百石以助之

廬州府志

劉聲字羣卓無爲人雍正時以保舉優行分發浙江收溫台海洋魚稅廉謹自持法寬而課減詳免漁人積欠八百餘兩海筏例徵銀八錢聲概請豁免海民德之

廬州府志

宋祐字履祺無爲舉人知內江縣擢刑部主事善折獄升銅仁知府歷調台州漢中長沙諸府慈惠寬仁治績有聲

廬州府志

汪衡字嵩鄰無爲人雍正庚戌進士官松江府教授修葺學宮

署華婁二縣篆案無畱牘人頌廉明

廬州府志

張植字樹茲巢縣人官建甯府通判改四川按察司經歷以軍

功遷合州知州適西徼羅卜藏丹書騷擾巴塘等處奉委征撫動合機宜復贊理西藏軍務所在有勞績歷官至雅州知府

廬州府志

府志

徐國顯合肥拔貢知翼城縣革陋規銀二千兩歲大饑傾家產數千金賑之仕至布政司參議

廬州府志

朱竑字漪同無爲人以貢官沅陽教諭屢署縣事黃河水溢漂

沒民舍力請免課散賑全活無算

廬州府志

李榮裕字獻丹廬江人雍正時以舉人知藍山縣縣處苗疆最難撫綏榮裕教以禮義民胥向化山水暴發漂沒田廬捐俸鬻產助民興復及攝桂陽知州藍山民追送數百里爲立祠繪像

祀之

廬州府志

倪岱字山宗合肥人雍正時舉賢良方正授固安知縣署涿州

事勤於政治恤士愛民捐俸賑饑寬免徭役以老乞休歸

廬州府志

許齊卓字武田合肥拔貢知德化縣雪革生李志煜冤李得開復中式移武平再移建陽修朱子祠墓置祭田其五經博士世襲久廢力爲詳請承襲又移龍溪築隄西關外以障水民不被災以老乞休歸

廬州府志

陳大化字鼇士廬江人乾隆戊辰進士授編修擢御史歷吏禮刑工四科給事中風裁凝峻遇事敢言出爲江蘇常鎮道乞養歸內艱服除起補江蘇松泰道濬開松浜去淤墊以資灌漑民德之調江蘇糧道署按察使以疾歸

廬州府志

張先岸合肥舉人揀發浙江署安吉州修築城垣振興文教有大吏私親某斃人命承讞者欲脫其罪先岸勘得實論如律大吏旋撫他故劾之遂歸

廬州府志

任之鋪字虞鐘舒城拔貢官如皋教諭嘗奉檄賑饑踰原額巡撫詰其濫對以舊例賑不及幼童今普給之費不過千金然爲國家廣無數生命矣復勘泰州水災乘扁舟徧訪疾苦全活無算擢知竹山縣亦以慈惠稱

廬州府志

王廷耀字薦揚合肥歲貢官阜陽訓導縣有王生者頗好訟多怨家有持數百金賄廷耀求報劣廷耀峻拒之而呼王生至規以謹言王感悟卒爲善士

阜陽縣志陽府名宦

舊志鳳新移

高廷選字煥初合肥舉人官青陽教諭率紳士捐資修葺學宮歲饑凡勘災給賑平糴諸務一秉公正旣去士民思之

廬州府志

黃思敏合肥拔貢訓導太和遷六合教諭所涖之處士習民風爲之不變委辦太和河工勘阜陽亳州水災及廬江虹縣六合等處賑務廉勤自矢大吏交推重之

廬州府志

廖闢芳字鶴餐合肥人乾隆甲戌中明通榜授賓州知州賓民鄙陋教以禮法風俗漸移以艱歸起補賓川州疏濬城河南民便之歸田後與弟宏鑰成父世瓊之志變產倣南雍所製樂器

於鄉學

應州府志

譚應騏字瑞徵合肥副貢考授州同分發廣西署休仁縣休民向無恆業應騏令習耕織創義學課生徒補梧州判歷知房縣時軍書旁午應騏率鄉勇討保康賊復其城撫綏招徠以疾卒

應州府志

王杏舒字倚雲合肥舉人知高陵縣調三原革陋規籌荒政杜絕奸商國販善政甚多擢迪化知州後補鬱林州以疾歸

應州府志

褚啟宗字亮儕合肥人乾隆庚辰進士知青浦縣有叔姪爭產者姪屬巨紳爲緩頰毅然拒之在任十年待士以禮潘吳淞江

修築城垣居財賦之區無苛索之擾民懷其惠

青浦志

曾璞字其琢舒城舉人知博羅縣飢民聚眾擄掠璞擒其渠勸化餘黨設法賑濟一邑晏然調海陽釋株累冤民無算卒於官

廬州府志

靳起柏字樹宗舒城人以貢官泉州判建石井書院崇祀朱子

修古陵險道葺海尾西橋嚴禁博徒盜賊斂跡以艱歸起補東

城兵馬司正指揮平心視事掩骼埋胔惠聲大著復以內艱歸

遂不起

廬州府志

王會燕字詒庭合肥舉人由四庫館議敘歷署諸大邑差務絡

繹悉心區畫在定興時設義學成就士類尤多補鉅鹿致仕歸

廬州府志

周洞字酌遠舒城人以貢官太平州判有德政升永康州調新

甯興利除害所至有聲苗蠻婚娶不事媒妁洞導以禮義俗爲

之變遷鬱林州乞養歸

廬州府志

趙壽朋字康旬合肥人以廩貢授訓導歷署含山六安全椒桐城學事含山諸生劉湘子貧不能娶壽朋資之完配在桐城諸生有以細故幾褫巾力請學使得以保全

廬州府志

吳光庭字榮階廬江人官貴陽通判擢黎平知府城南南龍山

爲明死節何騰蛟故里光庭爲購地建祠創黎陽書院以教士

卒於官士民祀之

廬州府志

蔡淮英字桐江合肥拔貢揀發河南知杞縣禮士愛民以忤上

官被劾歸里杞士民郊送四十里

杞縣志

劉崧字幹周巢縣人以武庠授京口高資營千總擢都司嘗爲營兵置義冢升福山遊擊調瓜州頻年火患乃建北極閣以厭

勝之遷吳淞參將時洋匪作患所在騷擾崧謂宜設兵駐防會

哨以策應軍府建之擢京口水師副總兵以勞卒官

廬州府志

張拱字能五廬江武舉補陝西柳樹澗守備累官定邊副將時

甘肅逆回滋事調靜甯新營辦理卡站招募新兵悉中機要以

老乞歸里吏議發往烏魯木齊効力派管鐵場三年所獲鐵溢

於正額復補河閒府副將乞休歸卒年八十一

廬州府志

張至幹字琴六合肥人乾隆甲辰進士授戶部主事遷郎中出

知夔州府時逆匪滋擾兵未集至幹募鄉勇殲其渠魁分門扼

守寇不敢犯復從剿王三槐等於鄖陽屢有俘獲以積勞成疾

卒子坦蔭縣丞

廬州府志以上舊志

胡觀濶字雙湖廬江舉人浙江知縣平反松陽徐姓冤獄溶慈

溪慈湖築隄弭水患累升江蘇蘇州知府廉得常熟賊賊雪事

主誣良僞命之枉太倉寶山民藉旱滋事捕其魁寘於法擢江西糧道告歸子稷字公望原名光榮由舉人員外郎任川東道會剿長壽縣教匪王和尚等悉擒之別獲蝸蟥苗匪百餘人又請定雇役法以輕徭役歷江南江西鹽道著鹽政利弊書四卷兼署江西按察使決餘干鄱陽人爭洲地案泊信豐鹽戶私增鍋戶獄雪蓮花廳人誣妾毒妻寃他如捐建宋臣文天祥謝枋得祠修明賢妃婁氏墓重刊宋本十三經注疏皆非俗吏所能

爲

廬江縣志
以下新修

黃鳴傑字季侯合肥進士由庶常改部海擢浙江布政使清介自持人不敢干以私授浙江巡撫罷歸有圖書數萬卷而已

合肥志

縣志

王星榆字損齋合肥進士官湖北利川知縣利川舊無城倡捐

築之有兄弟爭產者各以賄進星榆曰與其餽官曷若班諸兄

弟反復開導皆感泣而去

合肥縣志

龔善思字意船合肥進士任江蘇興化知縣道光癸巳秋大水
河督將開昭關壩以殺水勢善思力請遲十日民得刈穫河工
亦無害又創建文正書院躬自督課擢海州知州獲貧民販私
鹽者輒告誡矜釋之不忍藉以邀功嗣以擒海盜李佩章等升
知府尋罷歸

合肥縣志

吳淮無爲人江西道庫大使署新昌大姑嶺及新喻水北墟巡

檢有治行祀新昌名宦祠新喻人亦勒石焉

無爲州志

高學濂字希之無爲舉人四川知縣終資州知州所至培學校

興水利懲蠹胥捐設育嬰堂循聲卓著道光二十七年華陽江

安永川新津金堂開巴等縣資州江北廳士民請祀名宦祠

無爲縣志

州志

劉大烈字銘之巢縣人嘉慶初由縣丞升任江蘇丹徒知縣捐賑水災卓異洊升知府調廣西鎮安泗城護送安南貢使進京欽派陪宴

賞蟒服一襲升左江道道光二十九年髮逆股匪撲鎮安帶練防剿賊

退病歸旋卒

巢縣人

靳章紳舒城附貢官四川忠州知州力行實政升龍安府知府去州人寫其像並設主白鹿書院以祀之

舒城縣志

李文安本名文珩字玉泉合肥進士孝友尚義善舉甚多族里化之官刑曹十八年讞獄明允多所平反由郎中記名御史咸豐初粵逆東竄奉

旨督辦安徽國防時廬州已陷江北土匪蜂起文安駐臨淮募勇督剿

重修安徽通志

卷一百九十五

人物志

宦績

七

廬州府

遂通淮南之路進規廬州屢獲勝仗渡巢湖擊敗粵逆陳玉成於白石山下敘功以知府用旋助攻巢縣立功積勞卒於軍

廬

卹賜祭葬如例所部後成勁旅名曰淮軍從曾國藩及文安之子鴻

章等剿平髮捻云文安嫺武略並能文章著有詩文集及貫垣

紀事愚荃傲帚等書

合肥縣志補纂

章廷樑本名道杞字南有廬江附貢嘉慶中官湖北鹽法道捕鹽匪王七置於法請減鹽價便民署按察使讞河陽縣民何現入江陵傳教案坐現等罪釋株連三百餘人署布政使請准豁免沔陽天門漢川水淹田賦歲捐書院膏火及養濟育嬰經費嘉慶甲戌廬江旱捐千金助賑贍戚屬以累萬計解官後置義田義莊家塾道光癸未甲午水災捐賑二萬餘金同治七年奉

廬

江祀鄉賢祠

廬江縣志

高際盛舒城文生道光元年由郎中授浙江溫州府知府終杭州府歷官以清節自勵每由家運資自贍子均河南唐縣知縣以籌餉逾百萬敘升直隸州知州亦以清節繼志嘗卻賄三千

金

舒城縣志

王學懋字德昭合肥舉人以團練功洊保道員署常州知府時蘇常初復流亡未歸學懋招徠安集之以勞卒官同治四年

贈光祿寺卿附祀蘇州無錫昭忠祠

合肥縣志

姚繼勉字昭泉廬江進士山東知縣署鄒臨淄平反大獄勤職愛民食不兼味出入多步行以廉介稱擢兗州府同知告歸無田園之資旋卒於家

方宗誠文集
廬江縣志

江開字龍門廬江舉人陝西知縣創建紫陽縣書院捐濬咸陽縣渭河委辦西安同州鳳翔三府團練禦回匪有勞績

廬江縣志

章邦彥字樵雲廬江拔貢浙江知縣歷官新昌麗水修城治獄
除猾安良辦理荒賑實惠及民病歸於咸豐十一年在石猫山

罵賊遇害

廬江縣志

重修安徽通志卷一百九十六

人物志

宦績 十九

鳳陽府

周甘茂下蔡人因張儀樗里子而求見秦惠王王悅之蜀侯煇相壯反秦使茂定蜀還爲左丞相使之魏約伐韓茂恐樗里子公孫奭閒之要王盟於息壤遂伐韓宜陽五月不拔二人果爭之王召茂欲罷兵茂曰息壤在彼王曰有之因大起兵擊之遂拔宜陽後竟以向壽公孫奭之讒亡去卒於魏

史記本傳

甘羅茂之孫也年十二事秦相呂不韋秦使張唐相燕欲以燕伐趙以廣河閒之地唐不肯行甘羅怵之以白起之誅而唐請往羅復請於不韋往說趙因怵趙以張唐相燕將兵伐趙之事

而趙自割五城以廣河間甘羅還報秦封羅以上卿

史記本傳

漢陳萬年字幼公沛郡相人爲郡吏察舉至縣令遷廣陵太守以高第入爲右扶風遷太僕廉平內行修以丙吉薦代于定國爲御史大夫子咸字子康以萬年任爲郎有異材抗直數言事刺譏近臣遷爲左曹萬年卒元帝擢咸爲御史中丞總領州郡奏事課第諸刺史內執法殿中公卿皆敬憚之石顯用事顯權咸頗言其短顯憾之奏咸漏泄省中語下獄因廢成帝卽位補長史遷冀州刺史徵爲諫大夫出爲楚內史北海東郡太守坐王章免官復起爲南陽太守豪彊執服令行禁止後徵爲少府又爲光祿大夫給事中以事免

漢書本傳

薛廣德字長卿沛郡相人以魯詩教授楚國龔勝舍師事焉蕭望之薦廣德經行宜充本朝爲博士論石渠遷諫大夫代貢禹

爲長信少府御史大夫爲人溫雅有蘊藉及爲三公直言諫爭
始拜旬日上幸甘泉郊泰畤因畱射獵廣德上書諫上卽日還
其秋上酎祭宗廟出便門欲御樓船廣德當乘輿免冠頓首曰
宜從橋上亦從之後月餘乞骸骨賜安車駟馬東歸沛以爲榮
縣其安車傳子孫漢書本傳

竇子明銓人元封中陵陽令專務淵默化民清靜爲治縣務自

理

一統志太平寰宇記
舊志池州府名宦新移

范遷字子廬

按漢官儀
云字子闕

沛國人爲漁陽太守以智略安邊匈奴

不敢入界後爲河南尹永平四年代郭丹爲司徒有宅數畝田
不過一頃復推與其兄子其妻曰君有四子而無立錐之地可
餘奉祿以爲後世業遷曰吾備位大臣而蓄財求利何以示後

世八年正月薨在位四年家無擔石焉

後漢書
郭丹傳

徐防字謁卿沛國鉅人祖父宣爲講學大夫以易教授父憲亦傳宣業防少習父祖學永平中舉孝廉除爲郎體貌矜嚴占對可觀顯宗異之特補尙書郎職樞機周密畏慎和帝時遷司隸校尉出爲魏郡太守遷少府大司農拜司空防以五經久遠聖意難明宜爲章句以悟後學上書言太學試博士弟子皆以意說不修家法臣以爲博士及甲乙策試宜從其家章句開五十難以試之解釋多者爲上第引文明者爲高說若不依先師義有相伐皆正以爲非詔書下公卿皆從防言拜爲司徒遷太尉參錄尙書事安帝卽位以定策封龍鄉侯免就國卒子衡當嗣讓其弟崇數歲不得已乃出就爵云

後漢書本傳

夏勤字伯宗九江壽春人爲京宛二縣令零陵太守所在有理能稱安帝永初三年以鴻臚代魯恭爲司徒元初二年罷

後漢書安

帝紀樊宏傳
章懷太子注

陳寵字昭公沛國浚人咸之曾孫也咸第三子欽欽子躬建武
初爲廷尉左監早卒躬生寵明習家業少爲州郡吏辟司徒鮑
昱府勤心物務昱高其能轉爲辭曹掌天下獄訟其所平決無
不厭服眾心爲昱撰辭訟七卷公府奉以爲法肅宗初爲尙書
時吏政尙嚴寵以爲宜改前世苛俗乃上疏言之帝深敬納遂
詔有司絕鉗鎖諸慘酷之科解妖惡之禁除文致之請讞五十
餘事定著於令漢舊事斷獄報重常盡三冬帝始改用冬初十
月賈宗上言以爲宜盡三冬寵奏聖功美業不宜中疑帝納之
遂不復改出爲太山太守轉廣漢太守訟者日減郡中清肅擢
大司農永元六年爲廷尉數議疑獄務從寬恕十六年代徐防
爲司空寵雖傳法律而兼通經書奏議溫粹號爲任職在相位

三年薨

後漢書本傳

陳忠字伯始寵之子也永初中辟司徒府遷廷尉正司徒劉愷舉忠明習法律宜備機密擢拜尙書居三公曹忠自以世典刑法用心務在寬詳初父寵在廷尉上除漢法溢於甫刑者未施行忠略依寵意奏上二十三條爲決事比又上除蠶室刑解賊吏三世禁錮狂易殺人得減重論母子兄弟相代死聽赦所代者事皆施行安帝始親朝事忠以爲宜徵聘賢才以宣助風化數上薦隱逸及直道之士後連有災異詔上封事忠慮言事者激切或致不能容乃上疏豫通帝意忠以久次轉爲僕射遷尙書令延光三年拜司隸校尉糾正中官外戚賓客近倖憚之不欲忠在內出爲江夏太守復畱拜尙書令卒

後漢書本傳

桓典字公推沛郡龍亢人太常榮之元孫也傳其家業以尙書

教授潁川舉孝廉爲郎會沛相王吉被誅故人親戚無敢至者
典棄官收葬服喪三年負土成墳立祠堂而去辟司徒袁隗府
舉高第拜侍御史是時宦官秉權執政無所迴避常乘驄馬京
師畏憚爲之語曰行行且止避驄馬御史及黃巾賊起滎陽典
奉使督軍破賊獻帝卽位從西入關拜御史中丞賜爵關內侯

後漢書
桓榮傳

桓鸞字始春沛國龍亢人父良爲龍舒侯太尉焉之弟也少立
操行緼袍糲食不求盈餘以世濁不肯仕年四十餘太守向苗
舉鸞孝廉遷膠東令始到官而苗卒卽棄職奔喪終三年然後
歸江淮之間高其義後爲己吾汲二縣令甚有名跡徵拜議郎
上陳五事牾內豎不省以病免

後漢書桓榮傳
東觀漢記

劉馥字元潁沛國相人建安初曹操表爲揚州刺史馥單馬造

合肥空城建立州治恩化大行流民歸者以萬數於是聚諸生立學校廣屯田興治芍陂及茹陂七門吳塘諸竭以溉稻田官民有畜又高爲城壘多積木石編作草苫數千萬枚益貯魚膏數千斛爲戰守備建安十三年卒後孫權攻合肥天雨城欲崩以苫蓑覆之夜然脂照城以爲備士民追思之比之董安于之

守晉陽

三國志本傳

魏倉慈字孝仁淮南人建安中曹操開幕屯田於淮南以慈爲綏集都尉黃初末爲長安令清約有方吏民畏而愛之太和中遷燉煌太守郡在西陲喪亂隔絕大姓雄張慈到抑挫權右撫恤貧羸甚得其理歲決刑不過十人民翕然稱其德卒於官吏民悲痛如喪親戚圖畫其形立祠祀之

三國志本傳

劉子揚淮南成惠人汝南許邵名知人稱其佐世之才揚州輕

俠鄭寶擁部曲欲彊逼子揚越赴江表以計斬之乘寶馬詣寶營呼其渠帥喻以禍福遂統其眾歸廬江太守劉勳又從勳歸曹操辟爲司空倉曹掾授以心腹之任每有疑事輒以函問至一夜數十至操征張魯轉爲主簿黃初元年爲侍中賜爵關內侯太和中爲大鴻臚以大中大夫卒謚曰景子陶字季治善論縱橫爲當時所推曹爽時爲選部郎鄧颺之徒稱之以爲伊呂毋邱儉之起也司馬師以問陶陶答依違師怒出爲平原太守又追殺之

三國志劉騭傳並注
千寶晉紀

史渙字公劉沛國人少任俠有雄風曹操初起以客從行中軍校尉從征伐以忠勇顯常監諸將見親信轉中領軍掌禁兵封

列侯

三國志夏侯惇傳並注

劉靖相人馥之子也黃初中從黃門侍郎轉廬江太守遷尙書

賜爵關內侯出爲河南尹散騎常侍應璩作書稱之以爲雖昔
趙張三王之治未足以方後爲大司農衛尉進封廣陸亭侯上
疏陳儒訓之本遷鎮北將軍假節都督河北諸軍事靖以爲經
常之大法莫善於守防使民夷有別遂開拓邊守屯據險要又
修廣戾渠陵大竭水溉灌薊南北三更種稻邊民利之嘉平六
年薨追贈征北將軍封建成鄉侯諡曰景子熙嗣

三國志
劉馥傳

胡質字文德楚國壽春人父敏字通達以方正徵曹操問蔣濟
曰胡通達長者也甯有子孫否濟曰有子曰質規模大略不及
於父至於精良綜事過之操卽召質爲頓邱令黃初中爲吏部
郎常山太守遷任東莞在郡九年吏民便安遷荊州刺史加振
威將軍賜爵關內侯吳朱然圍樊城質輕車赴之城中乃安遷
征東將軍假節都督青徐諸軍事廣農積穀有兼年之儲置東

征臺且佃且守又通渠諸郡利舟楫嚴設備以待敵海邊無事
嘉平二年卒家無餘財惟有賜衣書篋而已追封陽陵亭侯謚

曰貞子威嗣

三國志本傳
明氏譜

蔣濟字子通楚國平阿人初仕郡計吏州別駕建安十三年孫
權圍合肥時軍有疾疫惟遣張喜領千騎解圍濟白刺史僞得
喜書云步騎四萬已到權聞而燒圍走拜丹陽太守文帝受禪
上萬機論帝善之黃初三年詔與曹仁征吳仁不從其言而敗
以濟代領其兵明帝卽位賜爵關內侯曹休率兵向皖濟策其
必敗請卽詔諸軍救之已而休累退還遇救而免累遷至護軍
將軍散騎常侍齊王時進爵昌陵亭侯遷太尉高堂隆論郊祀
以魏爲舜後濟爲文以追詰隆雜以俳諧而頗中其失司馬懿
誅曹爽濟初作書與爽言不過免官爽遂不出奔而致滅族自

病其言發疾卒

三國志本傳並注

桓範字元則沛國人世爲冠族延康中爲羽林左監以有文學與王象等典集皇覽明帝時爲中領軍尙書遷征虜將軍使持節都督青徐諸軍事以事坐免正始中拜大司農前在臺閣號爲曉事及爲司農又以清省稱嘗鈔撮漢書中雜事以意斟酌之名曰世要論曹爽輔政以範鄉里老宿特敬之及司馬懿欲誅爽閉城門範矯詔出城詣爽說其以天子赴許昌徵兵爲輔爽不能從範曰老子今坐卿兄弟族矣遂與爽等同誅

魏略

吳薛綜字敬文沛郡竹邑人孫權召爲五官中郎除合浦交阯太守黃龍三年建昌侯慮爲鎮軍大將軍屯半州以綜爲長史慮卒入守賊曹尙書遷尙書僕射時權盛怒欲親征公孫淵綜上書諫權遂不行徙選曹尙書爲太子少傅卒凡所著詩賦難

論數萬言名曰私議又定五宗圖述二京解皆傳於世子翊官

威南將軍

三國志本傳

魯肅字子敬臨淮東城人家富於財性好施與以賑貧結士爲務周瑜爲居巢長過候肅并求資糧肅指三千斛米一困與之遂相親接瑜薦肅於孫權與言大悅肅因說權鼎足江東以觀天下之變權遣肅弔劉表喪行至夏口聞曹操已據荊州肅徑到當陽迎劉備勸其與權併力肅旣反命眾皆勸權迎操肅獨說權召周瑜拒之遂破操於赤壁周瑜將死薦肅自代卽拜奮武校尉代瑜領兵威恩大行拜漢昌太守偏將軍從破皖城轉橫江將軍年四十六卒權爲舉哀遺腹子淑永安中爲昭武將軍都亭侯武昌督建衡中假節遷夏口督所在嚴整有方幹卒

子睦襲爵領兵馬

三國志本傳

鄭胄字敬先沛國人父札爲孫權從事中郎定朝儀胄有文武
谷局舉賢良稍遷建安太守呂壹賓客於郡犯法胄收付獄壹
懷恨密譖胄權大怒召胄還藩濬陳表爲請得釋後拜宣信校
尉遷執金吾子豐與陸雲善與雲詩相往反司徒張華辟未就

卒

三國志孫權傳並注

晉武陔字元夏沛國竹邑人父周魏衛尉陔沈敏有器量與二
弟韶茂並總角知名魏明帝世爲下邳太守累遷司隸校尉初
封亭侯改封薛縣侯泰始初拜尙書掌吏部遷左僕射左光祿
大夫開府儀同三司陔以宿齒舊臣名位隆重自以無佐命之
功又在魏已爲大臣不得已而在位深懷謙讓卒諡曰定子輔
嗣韶字叔夏歷吏部郎太子右衛率散騎常侍茂字季夏名亞
於陔爲上洛太守散騎常侍侍中尙書後爲荀愷所陷見害茂

清正方直聞於朝野天下傷焉侍中傅祗上表申明之追贈光

祿勳

晉書本傳

袁市字公冑淮南人好學以詞辯稱嘗詣中領軍何助自言能

爲劇縣除松滋令轉淮南大農

晉書本傳

胡威字伯武一名貌淮南壽春人魏荊州刺史質之子也威早

厲志尙質爲荊州威自京都省之十餘日告歸父賜絹一匹爲

裝威曰大人清高不審如何得此質曰是吾俸祿之餘以爲汝

糧威乃受之爲侍御史歷南鄉侯安豐太守遷徐州刺史勤於

政術風化大行入朝武帝謂曰卿與父孰清對曰臣父清恐人

知臣清恐人不知臣不及遠也累遷監豫州諸軍事右將軍豫

州刺史入爲尙書加奉車都尉拜前將軍監青州諸軍事青州

刺史封平春侯卒贈鎮東將軍諡曰烈子奕嗣奕字次孫仕至

平東將軍威弟熙字季象亦有幹用仕至益州刺史安東將軍

晉書
本傳

劉惔字眞長沛國相人祖宏字終嘏光祿勳宏兄粹字純嘏侍
中弟演字冲嘏吏部尙書並有名中朝時人語曰洛中雅雅有
三嘏父丹晉陵太守亦知名惔少清遠王導深器之論者比之
荀粲尙明帝女廬陵公主累遷丹陽令爲政清整門無雜賓每
奇桓溫才而知其有不臣之跡及溫爲荊州惔言於帝曰溫不
可使居形勝地其位號常宜抑之帝不納年三十六卒孫綽諫
之云居官無官官之跡處事無事事之心時人以爲名言晉書
本傳
桓宣譙國姪人祖詡義陽太守父弼冠軍長史宣開濟篤素爲
丞相舍人南中郎將王含請爲參軍祖逖攻樊雅求助於含遣
宣往宣卽說雅降之逖留宣討諸未服皆破之遷譙國內史逖

卒祖約與蘇峻同反宣拒約不與之同後陶侃使鎮襄陽以其
淮南部曲立義成郡招懷初附勸課農桑十餘年開石季龍再
遣騎攻之宣得眾心每以寡弱距守論者以爲次於祖逖周訪
庾亮爲荊州以宣爲都督河北前鋒征討軍事平北將軍司州
刺史假節鎮襄陽季龍使騎七千渡河攻之三面爲地窟攻城
宣募精勇出其不意殺傷數百多獲鎧馬賊解圍走庾翼代亮
更以宣爲都督司梁雍荊州之四郡軍事梁州刺史封竟陵縣
男宣久在襄陽綏撫僑舊甚有稱績卒贈鎮南將軍子戎官至

新野太守

晉書
本傳

桓伊字叔夏譙國鉅人父景有當世才仕至侍中丹陽尹中領
軍護軍將軍長社侯伊有武幹累遷大司馬參軍授淮南太守
以綏御有方進督豫州之十二郡揚州之江西五郡軍事建威

將軍歷陽太守與謝元共破苻堅別將王璽張蚝等封宣城縣
子又進都督豫州諸軍西中郎將豫州刺史苻堅南寇與謝元
俱破堅於肥水封永修縣侯進號右軍將軍伊在州十年綏撫
荒雜甚得物情遷都督江州荊州十郡豫州四郡軍事江州刺
史徵拜護軍將軍卒贈右將軍加散騎常侍謚曰烈子肅之嗣
卒子陵嗣伊弟名不才亦有將略討孫恩至冠軍將軍

晉書桓
宣傳

桓沖字幼子譙國龍亢人贈太常簡公彝之季子也從其兄溫
征伐有功督荊州五郡雍州京兆揚州義城軍事甯朔將軍義
城新野二郡太守又從溫破姚襄及虜周城進號征虜將軍賜
爵豐城公遷振威將軍江州刺史西陽譙二郡太守溫卒詔爲
中軍將軍都督江揚豫三州軍事盡忠王室謝安輔政沖解揚
州自求外出溫舊黨莫不扼腕而沖處之澹然改授都督徐兗

豫青揚五州軍事徐州刺史鎮京口加侍中復解徐州以車騎將軍都督豫江二州軍事遷鎮姑孰尋遷都督江荆梁益甯交廣七州軍事荊州刺史移鎮上明率前將軍劉波等伐苻堅拔筑陽攻武當走堅兖州刺史張崇又使兄子石虔伐堅襄陽太守閻震擒之以功封其次子謙宜陽侯卒贈太尉諡曰宣穆七子嗣謙修崇宏羨怡嗣字恭祖累官至西陽襄城二郡太守後領江夏相卒贈南中郎將諡曰靖

晉書桓彝傳

宋趙倫之字幼成下邳僮人宋孝穆皇后之弟也武帝起兵以軍功封閬中縣五等侯累遷雍州刺史武帝北伐倫之遣將出嶢柳大破姚泓於藍田及武帝受命以佐命功封霄城縣侯卒諡曰元子伯符字潤遠嗣少好弓馬爲甯遠將軍文帝卽位累遷徐兖二州刺史吏人畏之如虎而劫盜無敢入境後爲丹陽

尹子倩尙文帝女海鹽公主以事詔離婚伯符慙懼卒諡曰肅

傳國至孫勛

南史本傳

鄭黑壽陽人仕豫州刺史奉朝請殷敬珉叛黑起兵淮上東捍

敬珉西拒常珍奇遷司州刺史

宋書殷敬珉傳
資治通鑑

梁裴邃字淵明本河東聞喜人祖壽孫徙居壽陽爲宋前軍長
史父仲穆驍騎將軍邃十歲能屬文善左氏春秋刺史裴叔業
以壽陽降魏隨眾北徙爲魏郡太守梁天監初自拔南還求邊
境自效以爲廬江太守屢破魏軍以功封夷陵縣子後爲竟陵
太守開置屯田公私便之再遷北梁秦二州刺史復開創屯田
數千頃平義州降魏將封壽除豫州刺史加督鎮合肥督征討
諸軍事襲壽陽大敗魏將長孫承業在軍疾篤尋卒贈侍中左
衛將軍進爵爲侯諡曰烈子之禮嗣之禮字子義美容儀能言

元理累官都督北徐仁睢三州諸軍事卒於少府卿諡曰壯

梁書
本傳南

隋裴政字德表壽春人遂之孫之禮之子也幼明敏博聞強記達於時政在梁平侯景之亂以軍功封夷陵侯徵授給事黃門侍郎復副王琳拒蕭紀加平越中郎將鎮南府長史及周師圍荊州琳自桂州來赴難政請開道先報元帝爲周所獲蕭譽鎖之至城下許以富貴使謂元帝曰王僧辨已自爲帝王琳孤弱不復能來政許之旣而告城中曰援兵大至各自勉吾當碎身報國江陵陷周文帝聞其忠授員外散騎侍郎命與盧辨依周禮建六卿撰次朝儀車服器用多遵古禮事並施行尋授刑部下大夫轉少司憲用法寬平無有冤濫宣帝時以忤免隋高祖輔政召復本官開皇元年轉率更令加位上儀同三司詔與蘇

威等修定律令進位散騎常侍左庶子以數諫爲太子所疎出
爲襄州總管令行禁止小民蘇息稱爲神明卒年八十九子南
金仕至膳部郎

隋書本傳

樊叔略陳畱人父歡魏南兖州刺史阿陽侯屬高氏專權將謀
興復爲高氏所害叔略髡髮被腐刑給使殿省及身長九尺
志氣不凡高氏忌之遂奔關西周太祖引置左右襲爵爲侯以
功進封清鄉縣公拜汴州刺史號爲明決隋高祖受禪加上大
將軍進爵安定郡公遷相州刺史政爲當時第一百姓爲之語
曰智無窮清鄉公上下正樊安定徵爲司農卿吏人流涕立碑
頌德卒贈亳州刺史諡曰襄

隋書本傳

唐裴懷古壽州壽春人儀鳳中上書闕下補下邳主簿遷監察
御史姚雋道蠻反命馳驛輯之申明誅賞歸者日千計俄縛首

惡遂定南方蠻夏立石著功閩知微之使突厥懷古監其軍默

啜立知微稱可汗欲官懷古不屈囚軍中得亡歸遷祠部員外

郎始安賊歐陽倩眾數萬剽沒州縣以懷古爲桂州都督討之

諭以禍福賊迎降輕騎赴之至壁撫諭嶺外悉平徙相州刺史

并州大都督長史所至吏民懷愛俄轉幽州都督卒於官

唐書本傳

劉知謙壽州上蔡人黃巢自嶺表北還湖湘間羣盜蟻結知謙

據封州有詔卽授刺史兼賀水鎮使以遏梧桂知謙撫納流亡

愛畜用度養士卒得精兵萬人多具戰艦境內肅然

唐書本傳舊志

知謙卒子隱居喪賀江土民百餘人謀亂隱一夕盡誅之嶺南

節度使劉崇龜召補右都押牙兼賀水鎮使

通鑑廣東新志

龐巖字子肅壽春人第進士舉賢良方正策第一拜拾遺辭章

峭麗爲元微之李紳所厚薦爲翰林學士李逢吉逐李紳出巖

爲信州刺史復入稍遷太常少卿太和五年權京兆尹彊幹不

阿貴勢卒於官

唐書于志常傳

南唐李元清濠州人官永新制置使治境累年邊障晏如先是

夏賦準貢見緡民以變直折閱爲苦元清請納帛一疋折錢一

貫爲制民甚便之唐亡入汴義不仕二國因僞稱失明召驗之

揮刃將及頸目不爲瞬乃放歸

十國春秋本傳

劉奐壽春人性方言直嚴績薦爲監察御史起居舍人時論善

之

十國春秋嚴績傳

宋高覲字會之宿州靳人進士起家嘉興縣主簿累遷尙書屯

田員外郎通判泗州詔定淮南場茶法陳說利害不報召爲戶

部判官安撫河北還爲京西轉運使徙益州彭州廣碯麗水二

峽地出金宦者挾富人請置場募人採之覲曰聚眾山谷間與

夷獠雜處非遠方所宜奏罷之王蒙正恃章獻太后親多占田
嘉州詔勿收賦覲又極言其不可後受累謫通判杭州入爲鹽
鐵三司判官歷官給事中知單州卒子秉常爲梓州路轉運使

宋史
本傳

聞日新宿州臨渙人少爲本州牙職補三司使役吏歷遷至慶
州都監景德初命管勾邠甯環州駐泊兵馬時部署張凝屢入
邊界焚旗帳日新皆提兵應援移知慶州上言野溪三門恃險
請開古川道東至樂業鎮西出府城從之累官至萬州刺史大
中祥符初改文思使屢請對多所建白且自陳筋力尙壯願正
授刺郡守邊城以効用俄拜坊州刺史將祀汾陰改知同州後
爲昭州團練使知單州

宋史
本傳

呂夷簡字坦夫先世萊州人祖龜祥知壽州子孫遂爲壽州人

夷簡進士及第補絳州軍事推官累遷知濱州代還奏農器有算非所以勸力本也遂詔天下農器皆勿算擢提點兩浙刑獄遷尙書祠部員外郎時京師大建宮觀伐材木於南方工徒以期會急有死者夷簡請緩其役又言盛冬挽運艱苦須河流漸通以卒番送眞宗嘉其有爲國愛民之心仁宗卽位以給事中參知政事尋拜同中書門下平章事章懿太后爲順容薨宮中未治喪夷簡朝奏事因曰聞有宮嬪亡者太后遽引帝起有頃獨出曰卿何閒我母子夷簡曰太后他日不欲全劉氏乎遂請發喪成服備儀仗葬之大內火百官晨朝而宮門未開輔臣請對帝御拱辰門百官拜樓下夷簡獨不拜帝使問故曰宮廷有變百官願一望清光帝舉簾見之乃拜太后崩帝始親政事夷簡手疏陳八事封申國公徙許國公感風眩詔拜司空平章軍

國重事詔曰古謂並可療疾今翦以賜卿授司徒以太尉卒

宋史

呂公綽字仲祐夷簡長子歷知鄭州嘗問民疾苦父老曰官籍民產第賦役重至不敢多蓄牛田疇荒蕪公綽奏之自是牛不入籍遷工部員外郎爲史館修撰同判太常寺兼提舉修祭器公綽請悉更造採月令以薦新諸物配合爲圖考定禘祫時祭之禮爲郊祀總儀上之又言婦人當從夫諡眞宗諡章聖而後曰莊非禮宜更多施行之改樞密直學士知秦州古渭川諸羌來獻地卻之召爲龍圖閣學士進翰林侍讀學士卒贈諫議大夫

宋史呂夷簡傳

呂公弼字寶臣夷簡次子賜進士出身積遷直史館河北轉運使自寶元慶曆以來宿師備邊既西北撤警而將屯如故民疲

餽餉公弼始通御河漕粟實塞下治鐵以助經費除冗賦及民
逋數百萬仁宗材其爲擢都轉運使知瀛州權開封府帝謂宰
相曰公弼甚似其父知成都府寬而有威軍府肅然召入代蔡
襄爲三司使神宗時王安石知政事嫌其不附己公弼上章遜
位不許議衛兵不可減廩徙淮南及肉刑斷不可復帝皆從之
安石立新法將疏論之爲安石所知而先奏遂罷觀文殿學士

知太原府以疾請知鄭州判秦州卒諡惠穆

宋史呂夷簡傳

呂公孺字稚卿東簡四子賜進士出身占對詳敏仁宗以爲可
用爲開封府推官民鬻薪爲盜所奪逐之遭傷包拯命咎盜公
孺曰盜而傷主罪不止咎執不從拯善其守知永興軍徙河陽
洛口兵千人以久役思歸奮斧鉞排關不得入西走河橋諸將
請出兵掩擊公孺不聽遣牙兵數人迎諭之曰太守在此願自

首者止眾皆佇立以俟公孺索倡首者黥一人餘復役所眾皆

帖息擢戶部尚書卒

宋史呂夷簡傳

呂希哲字原明公著長子以蔭入官王安石爲政以希哲有賢名欲用爲講官辭曰辱公相知萬一從仕將不免異同則時昔相與之意盡矣安石乃止范祖禹言於哲宗曰希哲經術操行宜備勸講其父常稱爲不欺暗室詔以爲崇政殿說書紹聖黨論起爲劉拯林希所排分司南京居和州靜坐一室恬然自得靜坐以下舊志和州流寓引併洛淵源錄文今移并徽宗初以直祕閣知曹州旋遭崇甯黨禍奪職

宋史呂公著傳按舊志太平府名宦傳云紹聖初知太平州慈祥愷悌政聲高於正獻而本傳無知太平州文附錄以補史闕

呂希純字子進希哲弟也登第爲太常博士元祐祀明堂將用皇祐故事並饗天地百神皆以祖宗配希純言皇祐之禮不見

於經宜從元豐閒式以英宗配上帝悉罷從祀羣神得嚴父之義從之又請定納后婚禮拜中書舍人同修國史內侍梁從政劉惟簡除內省押班持不行闔寺側目連爲章惇張商英曾布所排後人崇甯黨籍卒

宋史呂公著傳

呂希道字景純壽州人丞相夷簡孫翰林侍讀學士公綽子慶曆六年召賜進士出身歷知解和滌汝澶湖毫七州皆有惠政去而人思之再知澶州發河朔保甲盜賊捕和德下獄窮治取其首領於劫掠處斬之元豐五年夏河東注靈平埽一多潰岸幾決希道馳至河上督役得無虞張適上河朔鹽利以助邊計詔推行之希道曰祖宗手詔在河朔之人可安不可擾適深恨怒初澶河未徙南北城相望河貫其內故并河爲禁地河旣徙而北流有盜劫掠他州縣夜道退澹適因奏強賊出城中過法

當按責守臣希道遂罷元祐五年爲少府監熙甯元豐閒士急

於進取希道獨雍容安分遇事有不可必力爭及元祐之初吏

治寬平希道雅量自如亦不改其故

施宿蘇詩注李焘續通鑑長編壽州志新増

苗時中字子居其先自壺關徙宿州以蔭主甯陵簿邑有古河

久湮請開導以溉田爲利甚溥人謂之苗公河調潞州司法參

軍郡守欲入一囚於死執不可守悟而聽之熙甯中爲梓州轉

運副使韓存寶討蠻乞第逗遛不行時中言之存寶不聽卒坐

誅林廣代存寶乞第既降復逸去林廣從時中言整軍以進會

有詔班師軍行時中以糧道遠創爲摺運法食以不乏官終戶

部侍郎

宋史本傳

呂開壽州人元豐時爲曹州判官轉運副使鮮于侁以免役事

付之開躬行一路雖深山窮谷咨謀靡不備至後爲利州路判

官

山東通志

呂好問字舜徒壽州人希哲子也以蔭補官坐黨人子弟廢蔡卞得政諷之曰子少親我卽列顯階好問笑而不答靖康元年以薦擢御史中丞先是徽宗將內禪詔解黨禁除新法而蔡京黨戚害其事莫肯行好問上疏言利害欽宗嚮納又疏蔡京過惡乞投海外削王安石王爵褒表江公望等除青苗之令章疏十上每奏對帝雖當食每使畢其說欽宗再幸金營好問實從已而金人立張邦昌以好問爲事務官因說邦昌以利害使亟還政且書白康王宜自立金人既退高宗卽位好問奉太后書詣行在高宗勞之曰宗廟獲全卿之力也除尙書右丞以恩封東萊郡侯避地卒於桂州

宋史本傳

呂本中字居仁壽州人好問子元符中主濟陰簿性清約不煩

而治紹興六年召赴行在特賜進士出身擢起居舍人兼權中書舍人苗互以賊敗有詔從黥本中奏止之又上書言自守之計必先有不可動之勢伺彼有翼一舉可克歷遷侍講兼權直學士院初本中與秦檜同爲郎相得甚歡檜旣相私有引用本中封還除目檜勉其書行卒不從又與趙鼎深相知鼎遷僕射本中草制有曰合晉楚之成不若尊王而賤霸散牛李之黨宋如明是以去非檜大怒風御史劾罷之卒諡文清

宋史本傳
山東通志

魏杞字南夫壽春人紹興壬戌進士知涇縣罷無名科費太平

繁昌二縣獲盜宰尉希公賞日加鍛鍊因誣引涇民五十三家

杞聞馳檄取審悉縱諸被誣者

罷無名以下舊志甯國府名宦文今移并

累遷宗正

少卿湯思退建和議命杞爲金通問使孝宗面諭一正名二退

師三減歲幣四不發歸附人杞條上十七事擬問對上隨事畫

可行次盱眙金將欲觀國書杞曰御封也見主當廷授至金館
伴張恭愈以國書稱大宋脅去大字杞拒之卒正敵國禮損歲
幣五萬不發歸正人北還上慰藉甚渥以使不辱命一歲至相

位卒贈特進謚文節

宋史本傳

王希呂字仲行宿州人渡江後自北歸南登乾道己丑進士除
右正言時張說以攀援戚屬擢用希呂上章劾之見斥直聲聞
遠邇淮右擇帥命希呂以知廬州兼安撫使修葺城守安集流
散兵民賴之加直寶文閣江西轉運副使召入歷官吏部尙書
出知紹興府百廢具舉尤敬禮文學端方之士天性廉潔遇利
害無回護意惟是之從居官廉潔至無屋可廬自紹興歸猶寓
僧寺上聞之賜錢造第

宋史本紀

董槐字廷植定遠人少喜言兵自方諸葛亮周瑜父永怒其言

乃折節受學於輔廣成嘉定癸酉進士爲廣德軍錄事參軍雪富人李桷之枉脫之於獄通判鎮江府會李全叛涉淮槐卽日將兵濟江而西全遁去乃還嘉熙時知江州流民渡江來歸者十餘萬槐發粟賑之至者如歸焉招降劇盜翟全用爲裨將由是諸盜皆自歸累遷江東安撫使知建康府兼行宮畱守軍政弗治爲賞三等以教士卒坐作進退擊刺之法歲餘盡爲精兵遷廣運判兼提點刑獄至邕州上守禦七策南方悉定召赴闕封定遠男上疏請抑損戚里恩澤以謝天下拜端明殿學士簽書樞密院事進封侯寶祐初參知政事進濠梁郡公每奏帝輒稱善拜右丞相兼樞密使以極言丁大全邪佞爲大全所劾策免景定初進封吉國又進許國三年五月二十八日旣夕天大雨烈風雷電槐起衣冠而坐麾婦人出爲諸生說兌謙二卦遂

卒贈太子少師諡文清

宋史本傳

帥寶字仲珍濠州人咸淳中授鹽官丞以清廉著擢昌化令勸農課士聽訟咸得其情後卒於官畱葬焉

浙江通志

王萬字處一家世發州父遊淮閒萬遂生長濠州少忠伉有大志究心當世急務尤精於邊防要害登嘉定癸未進士歷通判鎮江府時金初滅鄭清之謀乘虛取河洛萬謂當急爲自治之規已而元兵壓境三邊震動理宗下罪己詔吳泳起草以咨萬萬謂兵固失矣言之甚恐亦不可今邊民生意如髮宜以振厲奮發興感人心爲條具沿邊事宜徧告大臣要官又論用兵論屯田論戍守敷陳數萬言皆切於當世差知台州日坐廳事事至立斷吏無所售改業散去民亦化之不復訟郡大治擢御史疏論史嵩之不當相遷大理少卿差知甯國府召赴行在出爲

福建提點刑獄四川宣諭使參議力辭乞休致仕卒

宋史本傳

金王庭直壽春人皇統中為夏縣令文學政事蔚有可觀

山西通志

元孟祺字德卿宿州符離人幼敏悟善騎射辟掌書記以薦為

國史院編修官一時典冊多出其手巴延伐宋授祺為行省諮

議諸將爭趨臨安巴延問計祺曰若以兵相追宋必走問一旦

盜起三百年之積焚蕩無遺矣自請為使徵降表至宋取宋國

璽十二枚出巴延奏其功累官浙東按察使

元史本傳

張郁靈壁人父禮宋紹熙庚戌進士雖居顯宦讀書不輟郁登

至元丁亥進士歷官三十餘年一毫不敢苟取仕至參知政事

接人以謙私居必冠帶

江南通志靈壁縣志

呂師聖安豐人元貞閒為常州路總管時郡學久廢師聖經營

改建規模一新

南畿志